

Lelaki memandu dalam keadaan mabuk dipenjara setelah gagal bayar denda

SIBU: Seorang lelaki terpaksa menjalani hukuman penjara tiga bulan setelah gagal membayar hukuman denda yang dijatuhkan oleh Mahkamah Majistret di sini, semalam setelah disabitkan atas kesalahan memandu dalam keadaan mabuk.

Thomas Jabu, 48, terdahulu dijatuhi hukuman denda RM10,000 atau penjara tiga bulan oleh Majistret Oon Kork Chern, setelah mengaku bersalah terhadap pertuduhan di bawah Seksyen 45A(1) Akta Pengangkutan Jalan 1987.

Tertuduh turut dikenakan

hukuman penjara sehari, selain lesen memandunya digantung bagi tempoh dua tahun bermula dari tarikh sabit kesalahan.

Mengikut pertuduhan, Thomas didakwa memandu sebuah kenderaan pacuan di bawah pengaruh alkohol ketika ditahan di Jalan Tuanku Osman pada 5 Disember 2025, kira-kira jam 11.10 malam.

Berdasarkan fakta kes ringkas, pada hari kejadian, anggota polis trafik telah menahan seorang pemandu itu tertuduh di Jalan Tuanku Osman.

Ketika diperiksa oleh seorang anggota polis trafik, tertuduh didapati berbau alkohol dan ujian pernafasan menggunakan alat SD-2+ mendapati dia positif alkohol dengan bacaan 334mg/100ml.

Ujian lanjut menggunakan alat EBA II di Balai Polis Trafik Sibu mendapati bacaan alkohol dalam darah tertuduh pada paras 204mg/100ml, melebihi had yang dibenarkan iaitu 50mg/100ml.

Pendakwaan kes dikendalikan oleh Timbalan Pendakwa Raya Keshava Rao Tharma Raja, sementara tertuduh tidak diwakili.